
Rapport annual 2023

Alla fin digl onn 2023 munta igl inventari dalla Biblioteca Trun 4507 medias, quei 1828 per carschi, 1367 per giuvenils e 1312 per affons. La biblioteca ei stada aviarta 156 dis. Duront quei temps han 1659 persunas visitau la biblioteca ed han empristau biabein 3900 medias.

Ils bauns da leger havein nus postau sco mintg'onn en ils tschun differents loghens: a Trun sur Carmanera, a Trun spel Rein visavi la stalla Livers, a Schlans-Davaruns, a Rabius-Igniu sil plaz da giug ed a Cumpadials-Plaun Petschen sil plaz da giug.

Las classas dil consorzi da scola Sumvitg-Trun visetan regularmein nossa biblioteca cun lur scolasta. Aschia han els empristau il 2023 entuorn 700 medias.

Ils 25 da mars 2023 havein nus envidau la populaziun ad in «di dallas portas aviartas». Cun plascher havein nus astgau beneventar varga 50 persunas ch'han priu peda da visitar la biblioteca.

Pauli, il lieuret, ha visitau la biblioteca treis gadas duront igl onn 2023. Ils pignets gaudan d'udir ina historietta raquintada dad ina collaboratura dalla biblioteca.

Ils 24 da matg 2023 ha dr. med. Martin Tomaschett prelegiu ord il cudisch «Von der Säftelehre zur modernen Medizin» ch'el ha publicau. Sin ina moda interessanta e meinsvart humoristica ha el capiu da raquintar dils schabetgs e co la medischina ei semidada. Ina roscha convischins han visitau l'occurrenza.

Ils 12 da settember 2023 havein organisau ina prelecziun cun in anteriur convischin da Zignau, Guido I. Tomaschett. El ei enconuschents gia zaconts onns sco autur ed illustratur da cudischs d'affons. Uss ha el scret in roman historic che tracta dils onns cu la lingia dalla viafier retica ei vegnida baghegiada tochen Mustér.

Ils 10 da november 2023, per la sera da raquents, havein nus giu viseta da nossa convischina da Cumadé, Marlis Flepp. Ella ha raquintau e mussau co ella gida a conservar la historia dalla veta ed anflar pasch.

Cun scenas d'audio e film da Nicolaus Pfister da Schlans havein nus giu in bien schatg co quei sa tunar. Ils affons da Nicolaus Claudia Bundi-Pfister e Reto Pfister han raquintau ord lur experientscha ed ord lur vesta tgei ch'ei munta per els dad haver conservau la historia da veta da lur bab.

Per fin fevrer 2024 termineschel jeu miu pensum da lavur en biblioteca. Jeu engraziel pil bien sustegn e support da vart dalla cumissiun da biblioteca e da mias conluvreras ch'jeu haiel astgau sentir duront quels onns. Pil team dalla biblioteca giavischel vinavon bien success e perseveranza.

A nossa fideivla clientella auda nies sincer engraziel fetg per las visetas en biblioteca.

Per la Biblioteca Trun: *Olivia Pfister-Tgetgel, caubibliotecara*